



Bilten Saveza općina i gradova Federacije Bosne i Hercegovine



Godina: XX

Datum: 10.03.2023.

Broj: 285

ZAKLJUČCI SA VANREDNE SJEDNICE PREDSEDNIŠTVA SKUPŠTINE SAVEZA OPĆINA I GRADOVA FEDERACIJE BOSNE I HERCEGOVINE

USLUGE SAVEZA:

• PRAVNO SAVJETOVALIŠTE:

Selma Fišek, viši saradnik za pravna pitanja
selma@sogfbih.ba

• FINANSIJSKO SAVJETOVALIŠTE

Halko Basarić, viši saradnik za finansijska
pitanja
halko@sogfbih.ba

KORISNI LINKOVI ZA FONDVE EU:

www.southeast-europe.net
www.adriaticinnovationmap.eu
www.adrioninterreg.eu
www.europa.ba
www.cbibplus.eu
www.cbc.bih-mne.org
www.srb-bih.org
www.interreg-hr-ba-me2014-2020.eu
www.programmmed.eu
<https://tacso.eu/>
<https://evinfo.ba/en/>
www.balkanfund.org
<https://eacea.ec.europa.eu>
www.welcomeurope.com

ADRESA:

Musala br.5/1
71000 Sarajevo
Telefon: +387 33 216 502,
209 024, 209 120
fax: +387 33 552 810, 216 502
savez@sogfbih.ba

Predsjedništvo Skupštine Saveza općina i gradova Federacije Bosne i Hercegovine je dana 13.02.2023. godine održalo Vanrednu on-line sjednicu, na kojoj je, a na inicijativu Općine Travnik razmatrana mogućnost pružanja odgovarajuće pomoći članica Saveza zemljotresom pogođenim područjima u Republici Turskoj i Siriji.



Sjednici je predsjedavao predsjednik Predsjedništva SOGFBiH Hamdo Ejubović a prisutni su bili zamjenik predsjednika Mladen Mišurić Ramljak, te predstavnici općina i gradova Novi Grad Sarajevo, Grad Sarajevo, Travnik, Livno, Banovići i Neum u svojstvu članova ili ovlaštenih zamjenika članova Predsjedništva.

Na sjednici su jednoglasno usvojeni sljedeći zaključci:

Svjesni tragičnih ljudskih i materijalnih žrtava serije zemljotresa koji su 06.02.2023 godine pogodili Republiku Tursku i Siriju, koji su prema još uvijek nezvaničnim podacima odnijeli više od 30.000 života, te nanijeli nemjerljivu materijalnu štetu za veliko područje na kojem živi više od 13 miliona stanovnika, vođeni univerzalnim idejama humanosti, solidarnosti i zajedništva, prihvatajući svoju ulogu u globalnoj međunarodnoj porodici, konstatujući stalno zalaganje, posebno Republike Turske, za pomoć pri obnovi naše zemlje nakon rata u Bosni i Hercegovini:

1. Predsjedništvo Saveza poziva sve članice Saveza općina i gradova Federacije Bosne i Hercegovine da se u okviru svojih vlastitih mogućnosti odazovu i pomognu stradalim područjima Sirije i Turske;
2. Preporuka je da se to radi putem državnih institucija kada su u pitanju novčane pomoći, a u okviru materijalne pomoći u svim potrepštinama, da se to realizira u saradnji sa nekim organizacijama ili u vlastitoj režiji;
3. Potrebno je da Savez istraži i da provjerene smjernice svim članicama Saveza o dostupnim bankovnim računima državnih institucija Sirije i Turske na području Federacije Bosne i Hercegovine putem kojih se mogu vršiti uplate za pomoć;
4. Savez će uputiti pismo podrške Asocijaciji turskih općina i gradova izražavajući svoju sućut i spremnost na zajedničku saradnju prilikom obnove nastradalih područja;
5. Predsjedništvo Saveza naglašava da je ovo samo prioritarna pomoć, a da će se u okviru nastalih potreba nastaviti realizovati pomoć ugroženim područjima u najpotrebnijim oblastima (vezano za zdravstvene i obrazovne ustanove u smislu izgradnje škole ili bolnice);
6. Savez će od nadležnih organa urgentno tražiti informaciju o mogućnosti uplate finansijske pomoći ugroženim područjima u Turskoj i Siriji iz sredstava ostvarenih po osnovu posebne naknade za zaštitu od prirodnih i drugih nesreća;

7. Ukoliko odgovor nadležnih organa na pitanje iz prethodnog Zaključka bude negativan, Savez će nadležnim organima uputiti inicijativu za usvajanje izmjena Zakona o zaštiti i spašavanju ljudi i materijalnih dobara od prirodnih i drugih nesreća (po hitnom postupku) na način da se izmijene uslovi i način korištenja sredstava ostvarenih po osnovu [posebne naknade za zaštitu od prirodnih i drugih nesreća](#) u visini od 0,5 % od osnovice koju čine isplaćene neto plaće zaposlenika u radnom odnosu i svih lica angažovanih po ugovoru o vršenju privremenih i povremenih poslova i po ugovoru o djelu tako da se ista mogu koristiti i u svrhe pružanja [međunarodne](#) pomoći u slučajevima prirodnih i drugih nesreća;

8. Predsjedništvo Saveza insistira na pravednijoj raspodjeli posebne naknade za zaštitu od prirodnih i drugih nesreća na način da se ista uplaćuje po mjestu prebivališta zaposlenih, a ne prema sjedištu pravnog lica kako je to propisano Uputstvom o načinu obračunavanja i uplati posebne naknade za zaštitu od prirodnih i drugih nesreća;

9. Zaključci usvojeni na sjednici Predsjedništva Saveza će biti dostavljeni svim članicama Saveza i medijima.



UTVRĐENI REZULTATI PRIJEVREMENIH IZBORA ZA GRADONAČELNIKE GRADOVA BIHAĆ, TUZLA I SREBRENİK I NAČELNIKA OPĆINE VOGOŠĆA

Centralna izborna komisija Bosne i Hercegovine je, 13.02.2023. godine donijela Odluku o utvrđivanju i objavljivanju rezultata prijevremenih izbora za gradonačelnike gradova Bihać, Tuzla, Srebrenik i Zvornik i načelnika Općine Bratunac i Vogošća, održanih u nedjelju 5. februara 2023. godine.

Nakon utvrđivanja i objavljivanja rezultata prijevremenih izbora, Centralnoj izbornoj komisiji BiH može se podnijeti zahtjev za ponovno brojanje glasačkih listića u roku od tri dana, kao i prigovor na tačnost objavljenih rezultata u roku od 24 sata, od dana utvrđivanja i objavljivanja rezultata prijevremenih izbora.

U **Bihaću** je od 27.988 registrovanih glasača na prijevremene izbore izašlo njih 18.034 ili 64,43%. Od toga je bilo 17.843 važećih listića, odnosno 17.343 redovna listića, 323 koji su pristigli poštom i 177 za glasanje u odsustvu, putem mobilnog tima i diplomatsko konzularnih predstavništva.

Od 17.843 važećih listića **Elvedin Sedić**, POMAK - Pokret za modernu i aktivnu Krajinu dobio je 7.137 ili 40%, Hamdija Abdić, SDA dobio je 4.514 ili 25,30%, Adnan Habibija, SDP dobio je 4.056 ili 22,73%, Amarildo Mulić, nezavisni kandidat 1.542 ili 8,64% i Damir Đug, nezavisni kandidat 594 ili 3,33%.

U **Tuzli** je od 111.512 registrovanih glasača na prijevremene izbore izašlo njih 26.095 ili 23,40%. Od toga je bilo 26.029 važećih listića, odnosno 25.348 redovna listića, 299 koji su pristigli poštom i 382 za glasanje u odsustvu, putem mobilnog tima i diplomatsko konzularnih predstavništva.

Od 26.029 važećih listića **Zijad Lugavić**, SDP dobio je 12.433 ili 47,77%, Mirnes Ajanović, nezavisni kandidat dobio je 8.072 ili 31,01%, Omer Berbić, Naša stranka dobio je 4.510 ili 17,33%, Derviš Čičko, nezavisni kandidat dobio je 454 ili 1,74%, Almir Arnaut, nezavisni kandidat dobio je 295 ili 1,13% i Halid Žigić, nezavisni kandidat dobio je 265 ili 1,02%.

U **Srebreniku** je od 39.074 registrovanih glasača na prijevremene izbore izašlo njih 13.022 ili 33,32%. Od toga je bilo 12.924 važećih listića, odnosno 12.794 redovna listića, 112 koji su pristigli poštom, 17 za glasanje u odsustvu, putem mobilnog tima i diplomatsko konzularnih predstavništva i 1 potvrđeni.

Od 12.924 važeća listića **Adnan Bjelić**, Ujedinjeni (NIP-NS-SDP) dobio je 6.605 ili 51,11% i Nermin Tursić, SDA dobio je 6.319 ili 48,89%.

U **Vogošći** je od 58.097 registrovanih glasača na prijevremene izbore izašlo njih 8.493 ili 30,345%. Od toga je bilo 12.924 važećih listića, odnosno 8.182 redovna listića, 97 koji su pristigli poštom, 104 za glasanje u odsustvu, putem mobilnog tima i diplomatsko konzularnih predstavništva i 4 potvrđena.

Od 8.378 važećih listića 5.232 ili 64,12% dobio je **Migdad Hasanović**, SDA, a 2.950 ili 35,88% Adnana Šeraka, Ujedinjeni (NIP-NS-SDP).



*Za nove (grado)načelnike
u FBiH izabrani su:*

Elvedin Sedić,
gradonačelnik Bihaća;

Zijad Lugavić,
gradonačelnik Tuzle;

Adnan Bjelić,
gradonačelnik Srebrenika
i **Migdad Hasanović**
načelnik Vogošća.

RADNI SASTANAK NAČELNIKA KANTONA SARAJEVO

Na inicijativu načelnika Općine Trnovo, Ibri Berila, 13.02.2023. godine održan je sastanak općinskih načelnika Kantona Sarajevo. Sastanku održanom u Javorovom dolu na Bjelašnici prisustvovali su načelnik Općine Ilijaš, Akif Fazlić, Općine Ilidža, Nermin Muzur, Općine Stari Grad, Ibrahim Hadžibajrić, Općine Novo Sarajevo, Hasan Tanović, te novoizabrani načelnik Općine Vogošća, Migdad Hasanović.



Sa sastanka načelnika KS, 13.02.2023.

Tema razgovora bila je dosadašnja saradnja lokalnih zajednica Kantona Sarajevo, kao i njeno unapređenje. Odavno ističu potrebu uvođenja izmjena Zakona o lokalnoj samoupravi što bi u mnogome olakšalo i pojednostavilo rad općina, te bi iniciralo izmjenu zakona o pripadnosti javnih prihoda u korist lokalnih zajednica. Dalje se razgovaralo o donošenju prostorno planske dokumentacije, te o proceduralnim problemima prilikom donošenja iste. Jedna od tema razgovora je bila nametanje eksterne revizije donošenjem novog zakona o računovodstvu i reviziji, koji predstavlja još jedan teret na budžete lokalnih zajednica. Prilikom jučerašnjeg radnog sastanka je istaknuto i kako je jedan od većih problema svih lokalnih zajednica provedba zakona o javnim nabavkama, njegove složene procedure što u konačnici usporava provedbe budžeta i poštivanje rokova realizacije sporazuma sa višim nivoima vlasti.

Na sastanku su razmatrani zajednički problemi, čija bi rješenja doprinijela dobrobiti građana ovih općina, ali i cijelog Kantona Sarajevo.

Konstatovano je da općine Kantona imaju odličnu saradnju uprkos činjenici da ih vode načelnici iz različitih političkih partija. Interes građana stavljen je ispred interesa politike, a rezultat toga su zajedničke aktivnosti na boljem povezivanju. <https://vogosca.ba>

IZRADA MASTER PLANA AGLOMERACIJA U BIH ZA UČINKOVITO PLANIRANJE I IMPLEMENTACIJU EU DIREKTIVE O PREČIŠĆAVANJU KOMUNALNIH OTPADNIH

Krajem juna 2022. godine započela je realizacija projekta "Izrada Master plana aglomeracija u BiH za učinkovito planiranje i implementaciju EU Direktive o prečišćavanju komunalnih otpadnih voda (EU Urban Wastewater Treatment Directive (EU UWWTD))", koji finansira Delegacija EU BiH, a implementira SAFEGE SAS, u konzorciju sa Egis i Institut za hidrotehniku-HEIS Sarajevo.



Sa sastanka predstavnika Saveza sa UPKPF BiH i projektnog tima

Direktni/glavni korisnici projekta


su: Ministarstvo vanjske trgovine i ekonomskih odnosa BiH; Federalno ministarstvo poljoprivrede, vodoprivrede i šumarstva; Ministarstvo poljoprivrede, šumarstva i vodoprivrede RS; Vlada Brčko distrikta BiH- Odjel za poljoprivredu, šumarstvo i vodoprivredu; Agencija za vodno područje rijeke Save; Agencija za vodno područje Jadranskog mora; te Javna ustanova Vode Srpske.

Općine/opštine i gradovi i komunalna preduzeća za vodosnabdijevanje i odvodnju otpadnih voda u BiH su indirektni korisnici projekta.

Glavni očekivani rezultati projekta su:

Rezultat 1: Master planovi aglomeracija u BiH pripremljeni za provedbu UWWTD u BiH, a na temelju procjene trenutnog stanje razvoja sistema prikupljanja/prečišćavanja urbanih otpadnih voda u BiH i usklađeni sa pripremljenim Programom za implementaciju UWWTD u BiH;

Rezultat 2: Pripremljeni DSIP - Specifični plan za provođenje UWWTD i APID – Akcioni plan za provođenje UWWTD u BiH;




Rezultat 3: Pripremljen Program izgradnje kapaciteta koji se odnosi na provedbu UWWTD u BiH.

Treba istaknuti da će se pripremljeni program i planski dokumenti koristiti u postupcima pregovaranja BiH sa Delegacijom EU, koja će podržati implementaciju planiranih projekata. Stoga, od izuzetne je važnosti ostvarivanje pravovremene i efikasne suradnje projektnog tima sa općinama, gradovima i komunalnim preduzećima, radi dobivanja ažuriranih podataka koji će se koristiti kao osnova za izradu predmetnih planskih dokumenata.

U tom kontekstu, na sastanku održanom 08.02.2023. između predstavnika SOGFBIH, UPKPFBIH i projektnog tima, dogovorena je suradnja i podrška u komunikaciji i promociji istraživanja među općinama, gradovima i komunalnim preduzećima, koje bi trebale rezultirati rješavanjem problematike odvodnje i tretmana otpadnih voda. Općine i gradovi će pravovremeno biti obaviješteni o projektnim aktivnostima i rezultatima.



USPOSTAVLJANJE STRATEŠKOG I REGULATORNOG OKVIRA ZA RAZVOJ ESCO TRŽIŠTA U BOSNI I HERCEGOVINI



Savez općina i gradova Federacije Bosne i Hercegovine je 21.02.2023. godine uputio zahtjev za usvajanje Mape puta za razvoj ESCo tržišta u Bosni i Hercegovini od strane Vijeća ministara Bosne i Hercegovine i Pravilnika o ugovaranju i zaključivanju ugovora o energetske učinku od strane Ministarstva energije, rudarstva i industrije Federacije Bosne i Hercegovine na osnovu člana 42. Zakona o energetskej efikasnosti u Federaciji Bosne i Hercegovine.

Razvojni program Ujedinjenih nacija (UNDP) u Bosni i Hercegovini provodi projekat „Pokretanje okolišnog finansiranja u svrhu nisko-karbonskog urbanog razvoja“ (URBANLED), finansiran od strane Globalnog fonda za okoliš (GEF), u saradnji sa Savezom općina i gradova Federacije Bosne i Hercegovine, kao i institucionalnim partnerima na lokalnom, kantonalnom, entitetskom i državnom nivou, sa ciljem uspostavljanja ESCo modela poslovanja za provedbu projekata energetske efikasnosti.

ESCO (Energy Service Companies) model je zamišljen kao model provedbe projekata energetske efikasnosti u kojem se, umjesto opskrbljivanja energijom, provedbe radova i nabavke opreme za energetske obnovu objekata, sistema javne rasvjete i transporta otpada, pruža usluga uštede energije.

U ESCo modelu postoje najmanje dvije strane: privatna kompanija (ESCO kompanija) i klijent (javni partner, privatna kompanija ili građani). Klijent angažira ESCo kompaniju koja je specijalizirana za integrirana rješenja koja značajno smanjuju potrošnju energije. ESCo kompanija ulaže vlastita ili kreditna sredstva u rješenja koja umanjuju troškove klijentu, a klijent zahvaljujući uštedama u režijskim troškovima (potrošnja energenata i održavanje sistema) vraća uložena sredstva i planiranu naknadu za usluge ESCo kompaniji.

Do 2021. godine i intenziviranja aktivnosti na UNDP projektu URBANLED nisu postojali pravi ESCo primjeri u Bosni i Hercegovini.

ESCO (Energy Service Companies) model je zamišljen kao model provedbe projekata energetske efikasnosti u kojem se, umjesto opskrbljivanja energijom, provedbe radova i nabavke opreme za energetske obnovu objekata, sistema javne rasvjete i transporta otpada, pruža usluga uštede energije

Imajući u vidu barijere i pokretače na tržištu Bosne i Hercegovine, projekat URBANLED je kreirao strategiju za uvođenje ESCO-a koja predstavlja kombinaciju uspostavljanja zakonskog okvira, pojašnjenja pravila, demonstracionih projekata i obezbjeđivanja finansiranja kroz kombinovanu finansijsku šemu, za koju se očekuje da će dovesti do uspješnog uspostavljanja sistema, gdje ESCO projekti doprinose ukupnim ciljevima uštede energije. Projekat implementira aktivnosti koje omogućavaju preduslove za stvaranje potražnje, ponude i politike vođenog ESCO tržišta.

C2: LOW-CARBON PUBLIC FACILITIES AND UTILITIES

C1: INNOVATIVE FINANCING
MECHANISM FOR
IMPLEMENTATION OF LOW-
CARBON URBAN
DEVELOPMENT CONCEPT
(LCUD)



C4: NATIONAL AND
SECTOR POLICIES,
INSTITUTIONAL
COORDINATION AND
AWARENESS RAISING
ON LCUD

C3: LOW-CARBON WASTE MANAGEMENT

Tokom 2021. i 2022. godine započeta je realizacija 4 ESCo pilot projekta u javnim zgradama Srednjobosanskog kantona FBiH gdje je potpisan ugovor sa ESCo kompanijom i nedavno verifirane uštede u potrošnji toplotne energije. Dodatno, tokom prve polovine 2022. godine je objavljen javni poziv za ESCO kompanije za pilot ESCo projekat javne rasvjete u gradu Cazinu, koji je trenutno u procesu verifikacije projekta za energetska obnova koja prethodi ostvarivanju ušteda. U istom periodu pružena je tehnička asistencija velikom broju tijela javnih institucija u oba entiteta u izradi tehničke i druge dokumentacije za provođenje ESCo projekata. Tako se vrši priprema za projekte u oblasti zgradarstva, javne rasvjete, fotonaponskih sistema za proizvodnju el. energije, odvoza otpada,

gradskih mini-sistema grijanja i sl. Trenutno je pripremljeno preko 40 ESCo projekata i planirana je priprema dodatnih 30 ESCo projekata širom Bosne i Hercegovine.

U zakonodavnom smislu izvršene su izmjene i dopune Pravilnika o primjeni Zakona o porezu na dobit čime je regulisana oblast amortizacije za ESCo projekte u Federaciji Bosne i Hercegovine. Dodatno, započete su iste aktivnosti u Republici Srpskoj, kao i aktivnosti na regulisanju indirektnih poreza u ESCo projektima sa Upravom za indirektno oporezivanje Bosne i Hercegovine. Svim ovim aktivnostima je prethodila izrada Računovodstvenih smjernica za ESCo projekte u oba entiteta. Također, pripremljen je nacrt Pravilnika o pripremi, provođenju, praćenju i izvještavanju ESCo projekata.

Shodno svemu navedenom, Savez općina i gradova Federacije Bosne i Hercegovine i URBANLED projekat urgira i moli proaktivno djelovanje nadležnih organa na državnom i entitetskom nivou u svrhu uspostave strateškog i regulatornog okvira za razvoj ESCo tržišta u Bosni i Hercegovini.


PREZENTACIJA PROJEKTA POMOĆI LOKALNOJ SAMOUPRAVI (LGAA)

Preko 50 predstavnika jedinica lokalne samouprave (JLS) u Bosni i Hercegovini učestvovalo je na informativnoj sesiji o procesu odabira partnerskih JLS koju je 8. februara 2023. organizovao Projekat pomoći lokalnoj upravi (LGAA) koji finansira Američka agencija za međunarodni razvoj (USAID). Cilj Projekta je pružanje pomoći 30 partnerskih jedinica lokalne samouprave da postanu efikasnije, transparentnije i odgovornije u pružanju javnih usluga građanima i poslovnim subjektima te da jačaju vlastite kapacitete za ispunjavanje društveno-ekonomskih potreba svojih zajednica. Tokom informativne sesije, Levan Samadashvili, direktor projekta, i Almedina Šuvalija, zamjenica direktora, predstavili su ciljeve projekta, poziv za prijavu, objasnili proces odabira i dali odgovore na pitanja koja su postavili predstavnici JLS.



Tokom 2023. godine Projekat će raditi s 12 partnerskih JLS, a postupak odabira planirano je da bude završen do sredine marta. Drugi krug prijave za preostalih 18 partnerskih JLS bit će objavljen sredinom 2024. godine.

NAJAVA SEMINARA NA TEMU "UPRAVLJANJE ODNOSIMA S JAVNOŠĆU I VJEŠTINE KOMUNICIRANJA"



Savez općina i gradova Federacije Bosne i Hercegovine i Savez opština i gradova Republike Srpske organizatori su seminara pod nazivom **"Upravljanje odnosima s javnošću i vještine komuniciranja"**, a koja će se održati u **Tesliću, Hotel „Kardijal“, 16.03.2023 godine, sa početkom u 11.00 sati.**

Cilj seminara je da se učesnicima prenesu nova znanja i vještine iz oblasti odnosa sa javnošću i time poboljša interna i eksterna komunikacija opština i gradova. Učesnici će imati priliku da dobiju dodatna znanja i vještine iz oblasti uloge i značaja odnosa s javnošću, sistematske samoprocjene, komunikacijske kompetencije i vještine prezentovanja.

Seminar će voditi prof. dr. Semina Ajvaz, profesorica Univerziteta „Džemal Bijedić“ u Mostaru, koja će na interaktivan način obraditi teme i dati praktične primjere iz ove oblasti. Seminar je najmijenjen za osobe zadužene za odnose sa javnošću iz općina/gradova.

NAJAVA OBILJEŽAVANJA DANA OPĆINA / GRADOVA ZA MJESEC MART/ OŽUJAK I APRIL/ TRAVANJ

06. mart/ožujak - Dan Općine Hadžići. Taj dan se obilježava kao znak sjećanja na 6. mart 1996. godine, kada je izvršena reintegracija dijelova općine Hadžići koji su bili okupirani tokom agresije na Bosnu i Hercegovinu. Hadžići, Binježevo, Žunovnica, Grivići i Drozgometva su naselja koja su 6. marta 1996. godine predana legalnim vlastima Općine Hadžići.

10. mart/ožujak - Dan Općine Doboj Istok. Ovaj datum je izabran jer je na taj dan 1998. godine stupio na snagu Zakon o konstituiranju novih općina u FBiH i izmjeni područja općina podjeljenih međuentitetskom i međikantonalnom / međuzupanijskom crtom ("Sl. novine FBiH", br. 6/98) kojim je formirana Općina Doboj Istok.

10. mart/ožujak - Dan Općine Teočak. Ovaj datum je izabran jer je na taj dan 1998. godine stupio na snagu Zakon o konstituiranju novih općina u FBiH i izmjeni područja općina podjeljenih međuentitetskom i međikantonalnom / međuzupanijskom crtom ("Sl. novine FBiH", br. 6/98) kojim je formirana Općina Teočak.

12. mart/ožujak - Dan Općine Ilidža. Naime, 12. marta 1996. godine, provodeći odredbe Dejtonskog mirovnog sporazuma, realizirana je mirna reintegracija područja općine Ilidža.

15. mart/ožujak - Dan Općine Dobretići. Naime, na taj datum 1998. godine Parlament Federacije BiH formirao je Općinu Dobretići.

17. mart/ožujak - Dan Općine Trnovo. Na ovaj dan 1996. godine izvršena je reintegracije područja općine Trnovo.

18. mart/ožujak - Dan Općine Fojnica. Ovaj datum je uzet za obilježavanje Dana Općine jer se u dokumentima dubrovačkih trgovaca na taj dan 1365. godine prvi put spominje grad Fojnica.

18. mart/ožujak - Dan Općine Sapna. Ovaj dan je uzet za obilježavanje Dana Općine zato što je tog dana 1998. godine održana prva sjednica Općinskog vijeća novoformirane Općine Sapna.

19. mart/ožujak - Dan Općine Foča FBiH. Na ovaj dan 1996. godine izvršena je reintegracije dijela područja općine.



20. mart/ožujak - Dan Grada Zenica. Na taj dan 1436. godine Zenica je prvi put spomenuta u dokumentu kojim se dubrovačkim trgovcima omogućava slobodno kretanje i poslovanje na području Bosne.



21. mart/ožujak - Dan Općine Doboj Jug je 21. mart, kada je 1998. godine održana prva Konstituirajuća sjednica Općinskog vijeća nakon proglašenja - uspostavljanja novih općina. Također, na ovaj dan 1993. godine, Armija RBiH je zaustavila veliku neprijateljsku ofanzivu u Bici na Karušama, tzv.tenkovska bitka u kojoj su jedinice 203. Slavne motorizovane brigade ARBiH "Doboj-Bosna" uništili osam tenkova i tri transportera bivše JNA, odn.vojske tzv. RS-a.



21. mart/ožujak - Dan Općine Travnik.



06. april/travanj - Dan Grada Sarajevo. Obilježava se kao sjećanje na oslobođenja grada 1945. godine.



06. april/travanj - Dan Općine Breza. Obilježava se kao dan oslobođenja Breze od fašista 1945. godine.



15. april/travanj - Dan Općine Kakanj. Obilježava se u čast sjećanja na prvo spominjanje imena Kakanj u pisanim izvorima. Na taj dan 1392. godine kralj Stjepan Dabiša darovao je vojvodi Hrvoju Vukčiču dva sela u okolini Kakanja. Općinsko vijeće Kakanj je 14. marta 1996. godine odlučilo da se 15. april proglasi Danom Općine Kakanj.



28. april/travanj - Dan Općine Vitez. Na ovaj dan 1952. godine Narodna skupština NRBiH donijela je Zakon kojim je formirana Općina Vitez.



Gledajte Savez općina i gradova
Federacije Bosne i Hercegovine na



Poštovani čitaoci,

putem ovog biltena pružamo Vam mogućnost da se informišete o aktivnostima Saveza, o bitnim dešavanjima u općinama i gradovima, aktivnostima naših partnera, institucija vlasti, kao i o razmjeni najboljih iskustava i praksi.

Na ovaj način pružamo informacije o održanim sjednicama organa i tijela Saveza, konferencijama, seminarima, radionicama, okruglim stolovima, javnim raspravama, projektnim aktivnostima i sl.

Ukoliko želite da se prijavite za primanje ovog biltena možete to učiniti tako što ćete poslati e-mail na: dino@sogfbih.ba; ili putem popunjavanja forme na našoj web stranici.

Molimo vas da informacije o našem biltenu proslijedite svima u vašoj i susjednim JLS i drugim zainteresiranim.

Ukoliko želite da objavite neke od vaših novosti, iskoristite bilten Saveza koji je brz i efikasan način komuniciranja.

Sa zadovoljstvom očekujemo vaše komentare, sugestije ili primjedbe.